

28 FEB 1999

Mahathir-Berlepas

DR MAHATHIR BERLEPAS KE DHAKA UNTUK SIDANG KEMUNCAK D8

KUALA LUMPUR, 28 Feb (Bernama) -- Perdana Menteri Datuk Seri Dr Mahathir Mohamad berlepas ke Dhaka hari ini untuk menghadiri sidang kemuncak kedua kumpulan lapan negara Islam membangun (D8) yang dijadual berlangsung selama dua hari mulai esok.

Antara yang berada di Lapangan terbang Sultan Abdul Aziz Shah, Subang untuk mengucapkan selamat jalan kepada Dr Mahathir dan isterinya Datin Seri Dr Siti Hasmah Mohd Ali ialah Timbalan Perdana Menteri Datuk Seri Abdullah Badawi dan beberapa orang menteri.

Dr Mahathir dan pemimpin D8 akan membuat ucapan bagi negara masing-masing pada pembukaan sidang kemuncak itu yang berlangsung di pusat persidangan Winter Garden di Hotel Sheraton, esok.

Pada hari kedua, Dr Mahathir dan pemimpin lain akan berehat dengan menyusuli sungai dengan kapal pelancong "Mahsud" di Pagla Ghat.

Dr Mahathir akan juga menghadiri jamuan malam bersama rakyat Malaysia anjuran Persuruhjaya Tinggi Malaysia Datuk Zulkifly Abdul Rahman.

Perdana Menteri juga akan meletakkan kalungan bunga di Tugu Negara Bangladesh Savar Smriti Shoudha.

Beliau juga dijadual mengunjungi Perdana Menteri Bangladesh Sheikh Hasina.

Perdana Menteri dijangka mengambil kesempatan untuk menemui beberapa pemimpin untuk menyuarakan pandangan Malaysia mengenai isu antarabangsa termasuk krisis kewangan yang melanda negara-negara Asia termasuk Malaysia.

Ditubuhkan pada 1997 pada sidang kemuncak pertama di Istanbul, D8 mengandungi Bangladesh, Mesir, Indonesia, Iran, Malaysia, Nigeria, Pakistan dan Turki.

-- BERNAMA

ARA LAT